

sprüchleins Erklärung bisher in vier unterschiedenen Predigten angehöret vnd vernommen/erstlich/wer der Löwe sey/von dem allhie geredet wird/nemlich der ewige Sohn Gottes Christus Jesus. Darnach warumb Er ein Löw heisse/oder mit dem Löwen verglichen werde: Demnach was er gethan vnd außgerichtet habe/nemlich ritterlich vnd tapffer mit Sünd/Todt/Teuffel/Höll/Welt vnd vnsern geistlichen Feinden gekämpffet/ auch dieselben glücklich überwunden/ vnd mit ihrer ewigen schand vnd spott zu seinen Füßen gelegt: vnd dann jeso/was wir dessen alles gebessert seyen/ daß nemlich wir dardurch von aller Trawrigkeit vnserer Seelen erlöset/ vnd mit geistlicher Freude des Herzens/ hie zeitlich vnd dort ewiglich begabet werden sollen.

Wolan/dir/ O Herr Jesu/ du vnüberwindlicher Löw vom Stamm Juda/ du edle Wurzel David/ sagen wir alle/ samt mit herkslicher Demut vnd inbrünstiger Freude des Geistes Lob/ Ehr vnd Danck/ daß du auß grosser Liebe/ damit du vns von Ewigkeit geliebet/ in die Welt komen/ vnd in vnserm Fleisch/ mit vnsern grimmigen Feinden dem Teuffel/der Sünde/ dem Todt/ der Höll vnd Welt ritterlich für vns gestritten vnd gekämpffet/ sie auch durch deine Krafft vnd Weisheit allesamt überwunden vnd erlegt/ vnd dadurch vns ein ewiges jubiliren vnd triumphiren in dir zugerichtet: hilff/ lieber Herr/ daß wir vns solches deines freudenreichen Siegs allzeit trösten vnd erfreuen/ alle Anfechtungen der Sünden vnd des Teuffels dardurch überwinden/ auch die Sicherheit vnd alle Vnbussfertigkeit meiden: im gegentheil aber/ als deine trewe Knechte vnd Diener allzeit im Glauben vnd heiligem Wandel wachen/ damit wir die Krafft deines Siegs in vnserm gansen Leben/ an dem letzten Stündlein vnd Abschied auß dieser Welt vnd nach dieser Zeit ewiglich bey dir in himmlischer Freude vnd Seligkeit geniessen mögen. Dir samt dem Vatter vnd Heiligem Geist sey jetzt vnd in alle Ewigkeit/ Lob/ Ehr vnd Danck gesagt/ Amen.